

Minister Ursell Arends:

Delegacion di Sint Maarten ta na Aruba pa explora maneho di desperdicio dinamico implementa

Aruba ta e prome isla den Reino Hulandes cu a logra cera su dump y transiciona na un sistema di maneho di desperdicio mas responsabel, posicionando como un modelo pa sigui.

Den e contexto aki, delegacion di Sint Maarten ta na Aruba, dirigi door di Minister di Vivienda Publico, Medio Ambiente y Infraestructura, Sr. Patrice Gumbs. E delegacion lo conoce mas di cerca e transformacion aki y explora solucionnan cu por ta aplicabel na nan situacion na Sint Maarten.

E ciere di dump Parkietenbos a marca un comienso nobo den maneho di desperdicio di Aruba. Un paso cu mester a wordo tuma hopi aña atras mirando e dump tabata operando riba su capacidad pa decadas caba, y extremadamente dañino pa salud publico y medio ambiente. Hopi Gobierno anterior a duna di conoce nan intencion di cera esaki, pero no a logra. Probablemente paso e no tabata un decision popular. Esaki ta unda bienestar di Aruba mester a lidera e decision y no decisionnan populistica. Un decision cu ful Aruba por ta di acuerdo cu tabata necesario, pero specialmente esnan cu ta biba den vecindario, cu tabata sufri di e consecuencia di e cero toxico y huma preto na Parkietenbos.

Pa logra esaki diferente strate-



gia clave a wordo implementa, entre nan:

Redireccion di desperdicio pa reduci e cantidad cu tabata yega dump.

Tin cu menciona cu ya for di 2018, Serlimar mes no tabata tira desperdicio residencial of comercial na Parkietenbos mas, sino hiba na Ecotech pa wordo procesa, un acuerdo di Gobierno di e tempo ey.

Impulsa un sector di procesa desperdicio, creando oportunidad pa empresanan di reciclahe y sostenibilidad.

Desaroyo di strategianan a largo plaso, basa riba data di pasado y actual.

Fortalecimiento di cumplimiento y control, incluyendo medida pa duna boet ora tira sushi ilegal, esaki ainda ta den proceso mirando cu ta rekeri cooperacion di husticia.

E problema di maneho irresponsabel di desperdicio ta un desafio di hopi decada na Aruba. Prome cu a cuminsa cu e transformacion aki, Na 2012 segun e rapport di Cero Tolerancia a identifica 62 plot

habri, cual 31 tabata wordo usa como dump ilegal, awe nan ta 6. DNM ta monitoreando nan y e siguiente paso ta pa hunto cu BCI atende cu nan. Esaki ta demostra cu maneho di desperdicio no ta solamente un asunto di infraestructura, sino tambe di un cambio cultural y di comportacion den comunidad.

A pesar di e avancen, e transicion no a tuma luga sin desafio. Resistencia politico, incluso acto di tira sushi clandestino den anochi, y e implementacion di medidanan di control y cumplimiento tabata rekeri un esfuerzo considerable. Sinembargo, a traves di Bureau City Inspector (BCI), esfuerzo a wordo intensifica pa combati e practicanan ilegal aki y reforsa consciencia ambiental den e comunidad. Awe, tin mas control social, reportando actividad ilegal di dump pa proteha nos isla di esnan cu no ta demostra amor pa Aruba. Danki na e vigilancia di e pueblo, instancianan relevante por tuma ac-



cion rapido contra e irresponsabilidad di tira desperdicio ilegalmente. Paso caminda di hiba desperdicio tin, mas informacion riba limpi.aw.

Aruba ta riba e rumbo pa transiciona na un economia circular, promoviendo e principio di reduci, reusa y recicla. E planificacion di un Milieupark (Parke Ambiental) ta den proceso. Aruba for di basta aña tabata merece un centro clave pa procesamiento di desperdicio y recuperacion di recurso. Sinembargo, pueblo mester ta consciente cu solucion a un problema di mas cu 70 aña no ta un asunto di par di aña. E continuidad di e vision lo depende di compromiso di e proximo gobierno pa mantene e mesun voluntad politico pa sigui avansa cu solucionnan responsabel basa riba data, considerando semper e bienestar di pueblo, planeta y prosperidad.

Ademas, actualmente un estudio ta wordo realiza den colaboracion cu Universidad

di Georgia pa analisa comportamiento di ciudadano den relacion cu maneho di desperdicio. Esaki lo contribui na mehora strategianan implementa, specialmente separacion.

Riba e caminda pa un Aruba mas limpi, sector publico y priva tin un rol crucial. Ainda tin retonan pa soluciona, como amplia e orario di centronan di procesamiento di desperdicio riba weekend. Esaki mester wordo atendi den colaboracion cu e sector publico y priva.

E delegacion di Sint Maarten lo tin e oportunidad pa conoce detayadamente tur e iniciativas aki y tambe comparti conocimiento cu e ekipo di Aruba. E intercambio di experiencia no solamente lo fortifica cooperacion entre islanan di Caribe, sino tambe lo permiti pa avansa colectivamente den implementacion di solucionnan sostenibel y responsabel pa maneho di desperdicio den e region.

Rescate di dos persona di nan boto di piscado west di Aruba

Wardacosta Caribe Hulandes ayera nochi a ricibi un notificacion via di e radio maritimo VHF canal 16, na momento cu un boto tabata indica na un tankero cu e la haya problema riba lama.

E boto cu nomber Aribel tabata mas o menos 30 miya west di Aruba y e tripulacion tabatin mester di asistencia inmediatamente. E Centro di Operacion Maritimo di Wardacosta mesora a dirigi e helicopter pa e area caminda e boto tabata, pa por yuda e dos homber abordo.

Na yegada na e sitio e helicopter di Wardacosta a asisti e dos homber abordo y a hisa nan paden di e helicopter.



Despues di a saca nan for di nan boto a hiba e dos homber aeropuerto di Aruba, e dos personaa yega Aruba 'safe and

sound'. E boto Aribel a ser rescata awe pa e boto Orion di Aruba.

